

Sambüt  
Pêtrôs  
Nchih  
Rơh 2

## Nau bôk ăn bu gĩt lor

Nơm nchih sambüt dja rnha Pêtrôs, păng nchih sambüt dja klăp lah ta năm 64-67, klăp lah 31 năm jêh Brah Yêsu dâk rêh. Nôk păng nchih sambüt dja, păng mân lah nar bu nkhât păng boi ma tât jêh (2Pê 1:4), păng nchih sambüt dja ăn ma dăng lể phung nsing ma Brah Krist. Păng kuẩ sambüt dja sambüt păng tồl bar (2Pê 3:1). Ma nau khlay ta Pêtrôs, dăn uảnh ta nau bôk sambüt Pêtrôs rơh 1.

### *Nau ứch ntrống ta sambüt dja*

Ta sambüt dja Pêtrôs ứch n'hao nuih n'hâm phung nsing, păng đã njrăng ma nau bu nti nklă, păng mboh ma phung nsing, Brah Krist mra plở văch ngăn, păng mboh ma nau abă mra geh kêng ma nar Brah Krist plở văch. Păng mboh ma bu ăn gĩt n'hêl, Nau Kôranh Brah Ngơi jêng tă boh Kôranh Brah nơm ngơi ngăn, mâu ôh tă boh bunuyh (2Pê 1:20-21; 3:15-16), păng nti lah, bu moh i gĩt năl Kôranh Brah, gũ rêh tâm di ma nau Kôranh Brah ứch đống, bu moh i rống ma Kôranh Brah, rống ma bunuyh chiaio meng đống.

Mboh nau khlay ta nkỏ ta sambüt dja

- Nau ôp ueh lăng (1:1-2)
- Nau đã ăn lơ ma jru ta nau nsing ma Brah Yêsu Krist (1:3-11)
- Nau Pêtrôs ntĩnh nôk păng boi khât, ndrel ma nau khlay ta Nau Kôranh Brah Ngơi (1:12-21)
- Nau njrăng ma phung nơm nti nklă (2:1-22)

- Nau Kôranh Yêsu plở văch (3:1-16)
- Nau n'tính đă n'jrăng n'glễ dūt (3:17-18)

### *Nau ôp ueh lăng*

<sup>1</sup> Sambūt gâp Simôn i bu kuăl Pêtrô nchih. Gâp bunuyh sơm kơl jan kar ma\* Brah Yêsu Krist, ndrel ma i kôranh oh mon Păng, dẫn ôp nau ueh lăng khân ay may i lể sớ đơn jêh nau nsing ma Păng i dūt khlay, i tâm ban ma nau nsing hên. Bân lể sớ đơn jêh nau nsing i nây tă bớh nau sớng Brah Yêsu Krist i Brah bân, ndrel ma i nơm rklaih bân.\* <sup>2</sup> Dẫn nau ueh, ndrel ma nau đăp mpăn gũ ta khân ay may lơ ma hô ốk, tă bớh khân ay may lơ ma n'hêl gĩt năl Kôranh Brah, ndrel ma lơ ma n'hêl gĩt năl Brah Yêsu i Kôranh bân nây.

### *Nau đă ăn lơ ma jru ta nau nsing ma Brah Yêsu Krist*

<sup>3</sup> Tă bớh nau đơi Kôranh Brah nơm, Păng lể kơl bân ta ăp ntil nau, gay ma bân đơi gũ ngao tâm di đah nau Păng nơm ứch. Bân sớ đơn nau kơl i nây tă bớh bân gĩt năl Păng, Păng lể kuăl jêh bân jêng bon lan Păng nơm, tă bớh nau chrêk lợp Păng nơm, ndrel ma tă bớh nau ueh Păng nơm.\*

<sup>4</sup> Tă bớh nau chrêk lợp, ndrel ma nau ueh Păng nơm nây, dâng Kôranh Brah ton ăn nau dūt kuống nau dūt khlay ma bân. Păng ton kơt nây, gay ma nuih n'hâm bân jêng tâm ban ma nuih n'hâm Kôranh Brah, đăp ma bân klaih bớh nau đơh i tă bớh nau kơnh jan đơh i geh ta neh ntu dja.

<sup>5</sup> Lah ndri ăn khân ay may nsrôyh ma lể nuih n'hâm, ăn ntop đổng nau geh nuih n'hâm ueh ta nau khân ay may nsing ma Brah Yêsu Krist, jêh ri ăn ntop đổng nau gĩt vật nau Kôranh Brah ứch ta nau geh nuih n'hâm ueh,\* <sup>6</sup> ăn

\* 1:1 1:1: 'Bunuyh sơm kơl jan kar ma', mâu lah 'Dâk'. \* 1:1 1:1: Mat

4:18-20; 10:2; Luk 2:11 \* 1:3 1:3: 1Ti 6:12 \* 1:5 1:5: Mat 5:16; 1Pê 2:12,

ntop đồng nau blao mât njrăng sǎk ǎn gũ di keh ta nau gĩt vât nau Kôranh Brah ếch, ǎn ntop đồng nau ăt nuĩh n'hâm bol lah geh nau jêr ta nau blao mât njrăng sǎk ǎn gũ di keh, ǎn ntop đồng nau gũ ngao tâm di đah nau Kôranh Brah ếch ta nau ăt nuĩh n'hâm bol lah geh nau jêr,\* <sup>7</sup> ǎn ntop đồng nau tâm rông bǎl ndrăng oh nô ta phung nsing ta nau gũ ngao tâm di đah nau Kôranh Brah ếch, jêh ri ǎn ntop đồng nau rông ma dâng lể bunuyh ta nau tâm rông bǎl ndrăng oh nô ta phung nsing.\*

<sup>8</sup> Lah khân ay may geh dâng lể nau i nây lơ ma hô, lah ndri nau rêh khân ay may geh khlay, geh play ta nau gĩt nǎl lơ ma n'hêl Brah Yêsu Krist i Kôranh bân.\* <sup>9</sup> Yon ma bu moh i mâu geh ôh dâng lể nau i nây, pǎng i nây jêng tâm ban ma bunuyh cheh mǎt, uǎnh ngai mâu ôh say, jêh ri lể chuêl nau Kôranh Brah jut ǎn kloh nau tih i pǎng lể jan ê lor ma sât nsing nơh.\*

<sup>10</sup> Ó oh nô ta nau nsing, ǎn khân ay may nhhơ nau ueh ta nau gũ ngao khân ay may, gay ma bu say Kôranh Brah lể kơih khân ay may jêng phung bon lan Pǎng nơm ngǎn. Lah jan kơt nây, nau nsing khân ay may mra hơm nập nâng, mâu ôh roh.\* <sup>11</sup> Jêh ri khân ay may mra lǎp ta nau Brah Yêsu Krist mât uǎnh n'ho ro, ndâp ma nau rǎm maak, jêng nau mât uǎnh i Kôranh bân, i nơm rklaih bân.

### *Nau Pêtrô 1:7 nôm pǎng bơi khât*

<sup>12</sup> Gập hơm nkah nau i nây ǎn ma khân ay may bǎbơ, bol lah khân ay may lể gĩt jêh nau i nây, ndrel ma lể ndjôt nập nau ngǎn i bu lể ntũm nti ma khân ay may nây nơh kađôi.

<sup>13</sup> Nôm gập hơm gũ rêh ta neh ntu dja†, di ma gập nkah

---

\* 1:6 1:6: Gal 5:22      \* 1:7 1:7: Yôh 13:34-35; Rôm 12:10      \* 1:8 1:8: Yôh 15:4  
 \* 1:9 1:9: 1Yô 2:9-11      \* 1:10 1:10-11: Rôm 2:7; 2Tê 2:13-15; Hêb 12:18      † 1:13 1:13: 'Gũ rêh ta neh ntu dja', mâu lah 'Gũ ta chun bok dja'.

khân ay may ăn khân ay may hôm kah gít bảơ, <sup>14</sup> yorlah gáp lể gít jêh, gáp gũ rêh ta neh ntu dja hôm du blât đơm, jêh ri gáp khât<sup>‡</sup>, nau i nây Brah Yêsu Krist i Kôranh bân lể nhơ ăn gáp gít lor.\* <sup>15</sup> Lah ndri gáp goyh ngăn nkah khân ay may, gay ma khân ay may hôm kah gít bảơ dăng lể nau i nây, jêh gáp mâu hôm gũ ôh ta neh ntu dja.

*Nau chrêk lợp Brah Yêsu*

<sup>16</sup> Nau i hên mboh nkoch ăn khân ay may gít năl nau dơi Brah Yêsu Krist i Kôranh bân, ndrel ma nau Păng mra plở văch nây, mâu ôh di hên mboh nkoch dūt blao nau nklă, yon ma hên lể say nau chrêk lợp Păng nây ma trôm mắt hên nơm. <sup>17</sup> Kôranh Brah Bở nơm lể yôk Păng ăn Păng nau chrêk lợp ta nôk Kôranh Brah lah ma Păng, ndâp ma nau ang ral hô ngăn: ‘Păng dja Kon Gáp i Gáp rông hô ngăn, hô ngăn Gáp răm Păng’†. <sup>18</sup> Hên lể tăng jêh bở i nây tă bớh kalơ trôk, nôk hên gũ ndrel ma Păng ta kalơ yôk kloh ueh.

<sup>19</sup> Yor ma nau i nây bân lể gít lơ ma n'hêl ngăn, dăng lể nau ngơi mpôl bunuyh ntơyh nau ngơi Kôranh Brah kăl e nơh lể di ngăn. Ueh ngăn lah khân ay may iăt ngăn nau i nây, yorlah dăng lể nau i nây jêng tâm ban ma ũnh sagêng i ngaang ta ntũk ngo n'ho ma tăt lôh nar, i mong Brah Krist plở văch lôh ang ta nuih n'hâm bân, jêh ri Brah Krist i rnha ‘Mbing A Ôi’ đổng.\* <sup>20</sup> Nau i khlay rlau bu ăn khân ay may gít, dăng lể nau ntơyh i geh nchih ta Nau Kôranh Brah Ngơi, mâu geh ôh bunuyh dah ma mboh nkoch tâng nuih n'hâm păng nơm ũch,\* <sup>21</sup> yorlah dăng lể nau ntơyh i lôh bớh mpôl bunuyh ntơyh nau ngơi Kôranh Brah, mâu ôh di lôh tă bớh nuih n'hâm bunuyh, jêng lôh tă bớh Brah

‡ 1:14 1:14: ‘Gáp khât’, mâu lah ‘Bu mra n'groh chun bok săk jăn gáp’.

\* 1:14 1:14: Yôh 21:18-19 † 1:17 1:17: Mat 17:5; Mar 9:7; Luk 9:35 \* 1:19

1:19: Rôm 13:12; NTM 10:7; NMƠ 119:105 \* 1:20 1:20-21: Rôm 15:4; 2Ti 3:15-16

Huêng Ueh i kloh ueh nsük nsôh nuih n'hâm khân păng i nây.

## 2

### *Phung nôm nti nklă*

<sup>1</sup> Kăl e nơh geh mpôl bunuyh ntōyh nklă nau ngơi Kôranh Brah gũ ndrel ma phung Israel đōng. Kơt ndrì đōng mra geh nôm nti nklă ta phung khân ay may. Khân păng mra nti nklă blao hô ngăn, yơn ma nau nti i nây njũn bunuyh ta nau roh hêng. Khân păng mâu ôh ũch ăn Brah Yêsu Krist i Kôranh bân jan kôranh ma khân păng, bol lah Kôranh Yêsu Krist lě chuai khân păng nôm bơh nau tih, ndrì dăng khân păng mra roh hêng gơnh ro.\* <sup>2</sup> Jêh ri mra geh ők bunuyh ta phung nsing tâng nau khơh kler khân păng i nây, ndrì ma geh ők bunuyh mưch nau nti i nau ngăn, yor ma mpôl khân păng i nây.\* <sup>3</sup> Khân păng kơnh ma prăk hô ngăn, jêh ri mbrôh, gay ma geh prăk khân ay may. Kăl e nơh Kôranh Brah lě ơm mbrôh nkoeh nau tể dôi khân păng, jêh ri nau loh hêng lơi khân păng mâu ôh kộp jô.

<sup>4</sup> Bol lah phung tông pãr i lě jan tih kăl e nơh, Kôranh Brah kô mâu yỗ đōng, Kôranh Brah nklăch khân păng ta ntu brōng dũt ngo, kăt krũng khân păng ta ntũk nây gũ kộp tăt nar Kôranh Brah phat dôi tay\*.\* <sup>5</sup> Phung bunuyh djơh ta neh ntu kăl e nơh kô Kôranh Brah mâu yỗ đōng, nôk Păng ăn dak lêng dak đơng bũk dăng lě bunuyh djơh

---

\* 2:1 2:1: Mat 7:15; 24:11; Kar 20:29-30; 2Kô 11:13-15      \* 2:2 2:2-3: 1Ti 6:3-5; Yũđ 1:11      \* 2:4 2:4: Bân abao dja mâu hơm gĩt n'hêl ma nau Pêtrô nchih ta trong dja, geh bunuyh abă mân lah Pêtrô gĩt ma NNT 6:1-4.      \* 2:4 2:4: Yũđ 1:6

ta neh ntu. Yon ma Păng hêm rklaih bunuyh pơh nuyh, pham ma Nôê i bunuyh mboh nkoch nau sồng này đơm.\*

<sup>6</sup> Lồng bôn Sôđum, ndrel ma bôn Kômôra Kôranh Brah lể tể dôih đống, ăn lêk jêng ũnh buh, i này jêng nau ntât, Păng ũch nhhơ moh mra geh ta bunuyh djơh ta nar jât nấp tay.\* <sup>7</sup> Yon ma Kôranh Brah lể rklaih du huê bu klô rnha Lũt i bunuyh sồng, i bunuyh rngot ngãn ta nuih n'hâm yor ma say bunuyh ta nôk này jan djơh nâng ăp nar, tâm đống ăp ntil.\* <sup>8</sup> Lũt i bunuyh sồng i này ăp nar ngãn păng gũ ta nklang phung bunuyh djơh i này. Jêh ri yor ma păng jêng bunuyh sồng, ta trôm nuih n'hâm păng geh nau rngot dũt hô tã bơh păng say păng tăng dăng lể nđơ djơh ta phung khân păng i này jan. <sup>9</sup> Kot ndri Kôranh Brah blaok bók lơi, ăn klaih bơh nau jêh nau nđơm ma phung i tăng iăt nau Păng, yon ma phung djơh Păng krũng lơi ma tể dôih ta nar Păng phat dôih ri tay.\* <sup>10</sup> Păng tể dôih lơ ma hô ma phung i nđơ jan djơh tăng rnglay sắk kơnh, ndrel ma phung i mưch rmot tâm rdâng ma bu moh i jan kôranh ma khân păng. Dăng lể phung i này khân păng n'hi êng sắk, ndrel ma dăng bôk hô ngãn, mâu ôh klach ngơi djơh mưch rmot ma nơm êng êng† ta kalơ trôk i geh nau chrêk lơp.\* <sup>11</sup> Bol lah tông pãr i geh n'hâm suan dăng, ndrel ma geh nau dơi rlau ma phung i này, phung tông pãr i này kô mâu bảnh đống ngơi djơh mưch rmot nơm êng êng kot này ta nấp mắt Kôranh Brah. <sup>12</sup> Yon ma phung i này ngơi djơh mưch rmot ma nđơ êng êng i khân păng mâu gĩt văt, khân păng jêng tâm ban ma mpômpa (siũm) i mâu ôh geh nau mân

\* 2:5 2:5: 1Pê 3:19-20; 4:6; NNT 7:5-23 \* 2:6 2:6: NNT 19:24-25 \* 2:7 2:7-8: NNT 19:1-22 \* 2:9 2:9: 1Kô 10:13; Hêb 2:17-18; 4:14-16 † 2:10 2:10: Bân mâu ôh gĩt n'hêl nau khlay ta 'Nơm êng êng', yon ma geh bunuyh abã mân lah nau i này ngơi ma tông pãr. \* 2:10 2:10-11: Yuđ 1:8-9

mâu ôh gýt vât ndơ, i ăn bre ma nhữp nkhât roh hêng, bu mra nkhât roh hêng khân păng tâm ban kot ma mpômpa (siũm) đờng.\*

<sup>13</sup> Nau tẻ dôi khân păng tay, jêng tâm di ma ndơ djơh khân păng jan. Khân păng i này lẽ jan tâng nau kơnh djơh khân păng nơm ta ang nôk nar kadoi, gay ma rãm maak ma khân păng nơm dơm. Khân păng jêng bunuyh nuih n'hâm bở bởch ăn khân ay may đit prêng, mbrôh khân ay may nôk khân păng gũ nhêt sông sa kuông đah khân ay may.\* <sup>14</sup> Nuih n'hâm khân păng ứch ngãn ma lôm ur lôm sai, mâu ôh blao dâl jan tih. Khân păng ứch ngãn tẻk mphỏk phung i mâu lẳng geh nau nsing nập, jêh ri khân păng hô ngãn kơnh geh prắc ỏk. Dâng lẽ khân păng i này, Kôranh Brah rtáp ma khân păng!\* <sup>15</sup> Khân păng i này lẽ mbảr lơi trong di, lẽ hiot, jêh ri hãn tâng trong du huê bu klô rnha Balam i kon Bêor, păng lẽ nti bu blao ndơm phung Israel kãl e nơh, jêng bunuyh i kơnh geh prắc ỏk tả bớh bu nkhôm ma jan ndơ djơh.\* <sup>16</sup> Yơn ma bunuyh i này lẽ geh nau nduih jêh ma nau tih păng: Seh lia mâu blao ngơi, jêng blao ngơi tâm ban ma bunuyh, buay păng mâu ăn jan ndơ rluk này.\*

<sup>17</sup> Dâng lẽ phung ndơ jan djơh i này tâm ban ma tu dak i lẽ kroh nkỏng, mâu lah tâm ban ma tũk lêm i sial phứt de rdu, lẽ geh ndráp jêh ntũk ngo chẻk kôlắk ngãn ro ma ăn khân păng gũ.\* <sup>18</sup> Khân păng mbrớh ngơi n'hi êng sắk dũt nau ngãn, tih ma mâu ôh geh nau khlay. Khân păng tẻk mphỏk mpôl i mhe sắt nsing mhe klaih bớh nau gũ ngao djơh, mpôl i này ứch iắt nau khân păng, yor ma khân păng jả đờng nau ndờ kơnh djơh ta nuih n'hâm bunuyh.

\* 2:12 2:12: Yuđ 1:10 \* 2:13 2:13: Yuđ 1:12 \* 2:14 2:14: Mat 5:27-28;

Êph 5:5; 1Ti 6:10 \* 2:15 2:15: NKơ 22:5 \* 2:16 2:16: NKơ 22:28-30

\* 2:17 2:17: Yuđ 1:12-13

<sup>19</sup> Khân păng lah ma mpôl i nây: “Lah khân ay may jan tâng nau hên dja, mâu ôh khăch jan tâng nau bu đã bu buay tâm ban ma jan dăk ma nau đã buay i nây, dah nôm ũch jan hỡ” tih ma khân păng nôm jêng tâm ban ma dăk ma nau tih chrao mâu hôm ôh blao bah jan tih, yorlah bunuyh jêng tâm ban ma dăk ma dăng lể nau i geh nau dơi ma păng nôm.\* <sup>20</sup> Khân păng a lor nơh lể klaih jêh bớh nau djơh ta neh ntu dja tă bớh năl Brah Yêsu Krist i Kôranh bân, i nôm năk rklaih bân, jêh ri plỡ lăp tay ta nau djơh i nây du tỡ jât. Nau tih dơi ma khân păng, lah ndri nau rêh khân păng i nây geh nau jêr rlau ma i bớh ntôm nơh jât.\* <sup>21</sup> Ueh rlau lah khân păng mâu ôh gít năl trong i ăn Kôranh Brah kớp khân păng sống nơh, đah ma gít năl, jêh ri plỡ jât kới tâm rlăch mâu ũch jan tâng nau Kôranh Brah đã i bu lể nti ma khân păng nơh. <sup>22</sup> Nau i geh ta khân păng i nây jêng di ngăn ta nau ngơi hờ i bu vay lah:

‘So plỡ sa hok păng nôm’†

Jêh ri:

‘Sữr lể jêh bu ndũm plỡ pung tay ta dak bۆk’.

### 3

#### *Nau Kôranh Yêsu plỡ văch*

<sup>1</sup> Ở oh nô ta nau nsing i gập rống, dja jêng sambũt rờh bar i gập nchih njuăl ăn ma khân ay may. Nau ta trôm sambũt lể bar dja, gập lể nkah khân ay may ăn khân ay may geh nuhi n'hâm nau mân ueh. <sup>2</sup> Khân ay may lơi ôh chuêl dăng lể nau i mpôl bunuyh ntơy nau ngơi Kôranh Brah lể nchih jêh kăl e nơh, dăng lể khân păng i nây i bunuyh kloh ueh. Lới chuêl đống nau Brah Yêsu Krist đã,

---

\* 2:19 2:19: Yôh 8:34; Rôm 6:16      \* 2:20 2:20-22: 1Yô 5:10-12      † 2:22: Hờ 26:11



Păng i Kôranh i nôm Năk Rklaih bân, nau đã i nây hên i mpôl kôranh oh mon lě jêh ntũm nti khân ay may nơh.

<sup>3</sup> Ăn khân ay may gĩt nau i khlay rlau bu dja: Ta rnôk n'glě dũt\* mra geh bunuyh i gũ ngao tâng rnglay săk khân păng nôm kơnh đơm, jêh ri gơm mưch nau nti i ngăh.\*

<sup>4</sup> Khân păng mra lah: “Khân ay may lah Brah Yêsu Krist lě ton plở văch tay ta neh ntu dja, ah Păng abao dja hio? Ntơm bơh phung u che bân khât tăt ma abao dja hơm kot ơm nâng đơm, nơh ta neh ntu dja hơm kot ơm, kot ntơm njêng neh ntu nơh đơng, mâu ôh say geh nau rgâl!” <sup>5</sup> Yơn ma khân păng i nây jan lah chuêl, Kôranh Brah njêng trôk, ndrel ma neh ntu jêng tă bơh nau ngơi Păng nôm, kơh neh lôh tă bơh dak, jêh ri kơh gũ ta nklang dak.\* <sup>6</sup> Jêh ri Păng đơng dak lêng dak đơng gay ma n'groh lơi dăng lě nơh ta neh ntu lě phiao. <sup>7</sup> Jêh ri tă bơh nau ngơi Kôranh Brah đơng, trôk, ndrel ma neh ntu abao dja, Kôranh Brah lě ndrăp ăn ũnh ma su lơi lě phiao ta nar Păng phat dôi h dăng lě bunuyh, ndăp ma n'groh lơi phung bunuyh djơh ăn lě phiao.\*

<sup>8</sup> Ố oh nô ta nau nsing i gập rờng, ăn khân ay may kah gĩt nau dja: Ma Kôranh Brah, du nar tâm ban ma 1000 năm, jêh ri 1000 năm tâm ban ma du nar đơm đơng.\* <sup>9</sup> Kôranh Yêsu mra văch ngăh tâng nau Păng ton i nây, Kôranh Brah mâu ôh chuêl mâu ôh jở ir kot bunuyh abă mân. Yơn ma Păng ăt nuh ma bân, yorlah Păng mâu ũch ôh ăn du huê bunuyh roh hêng, Păng ũch ngăh ăn dăng lě bunuyh rgâl lơi nuh n'hâm djơh.\* <sup>10</sup> Nar Kôranh Yêsu văch, bu mâu

\* 3:3 3:3: Ta nau tâm rnglăp mhe mbơh ma bân, jêh Brah Yêsu hao săt ta kalơ trôk, tăt ma Păng plở văch, jêng rnôk n'glě dũt. \* 3:3 3:3-4: Mat 24:23-24; 1Ti 4:1-2; Yudđ 1:18-19 \* 3:5 3:5-6: Nnt 7:5-23 \* 3:7 3:7: 1Pê 4:17-19; NTM 21:1 \* 3:8 3:8: NMỔ 90:4 \* 3:9 3:9: 1Ti 2:4; Tit 1:1

ôh gít lor, jêng tâm ban ma bunuyh ntũng hăn ntũng bu. Nôk nây trôk mra lêk lě phiao ndâp ma dút nteh, jêh ri dâng lě ntil ndơ ùnh mra sa lě phiao, jêh ri neh ntu, ndâp ma dâng lě ndơ bu jan ta neh ntu nơh bu mra say n'hêl naně ngăn, gay ma Kôranh Brah phat dôih†.\*

<sup>11</sup> Lah dâng lě ndơ i nây mra roh lêk lě phiao kot nây ngăn, lah ndri ta nau gũ ngao khân ay may ăn khân ay may jan ăn dút ueh, ndrel ma gũ tâm di ma nau Kôranh Brah ùch hô ngăn dô! <sup>12</sup> Ăn khân ay may nsrôyh gũ kôp, jêh ri ăn kôl gay ma nar Kôranh Brah phat dôih nây ăn gơnh tât, jêng nar i trôk mra lêk ùnh sa lě phiao, jêh ri dâng lě ndơ mra roh lêk ta ùnh lě phiao đōng. <sup>13</sup> Ndri dâng bân gũ kôp tât geh trôk mhe, ndrel ma neh ntu mhe i geh nau ueh nau sōng i lě Păng ton jêh.\*

<sup>14</sup> Ở oh nô ta nau nsing i gập rōng, yorlah khân ay may hōm gũ kôp dâng lě nau i nây, ăn khân ay may geh nuìh n'hâm gơyh hô ngăn, gay ma Kôranh Brah mâu ôh say nau ma nduih ta khân ay may i tâm ban ma nau uk rmao, gay ma Păng say khân ay may gũ rêh đăp mpăn ndrel Păng hō,\* <sup>15</sup> jêh ri ăn khân ay may vât nau dja, nau Kôranh bân ăt nuìh ê hō Păng plở văch nây, tă bōh Păng ùch bunuyh geh nau rklaih. Kot nây đōng, Pôl i oh nô ta nau nsing i gập rōng, păng lě nchih ta sambüt i păng njuăl ăn ma khân ay may nơh, păng nchih tâng ma nau mân gít blao i Kôranh Brah lě ăn jêh ma păng.\* <sup>16</sup> Ấp sambüt i păng lě geh nchih, păng nchih kot i nây dadê đōng. Ta sambüt păng geh nau abă i jêr vât, jan ăn bunuyh i rluk, ndrel ma bunuyh i nsing mâu nập rgâl nau jêr vât jêng tih ma nau

† 3:10 3:10: 'Ndâp ma dâng lě ndơ...phat dôih', ta sambüt i nchih ma ti abă geh nchih tâm tih bảl: 'Ndâp ma dâng lě ndơ i geh ta neh ntu mra roh lêk'.

\* 3:10 3:10: 1Tê 5:2; Mat 24:29; NTM 20:11; 21:1 \* 3:13 3:13: Rôm 8:20-22;

Êph 1:10 \* 3:14 3:14: Tit 2:13 \* 3:15 3:15: 2Pê 3:9; Rôm 2:4

khlay ơm, kot ma khân păng lẽ geh rgâl nau khlay ta Nau Kôranh Brah Ngơi abă êng đống, kot ndri jan ăn săk khân păng nơm n'ho ma roh hêng.

*Nau đă njrăng n'glễ dũt*

<sup>17</sup> Ơ oh nô ta nau nsing i gập rống, gập lẽ ăn khân ay may lẽ gít dâng lẽ nau i này jêh, lah ndri ăn khân ay may gũ njrăng săk, gay ma khân ay may mâu ôh iăt tâng nau nti nklă mpôl bunuyh djơh i này, jêh ri chuêl nau nti ngăn i khân ay may lẽ ndjôt.\* <sup>18</sup> Yơn ma ăn khân ay may lơ ma hô gũ nập ta nau ueh Brah Yêsu Krist, ndập ma ta nau gít năl Păng i kôranh bân, i nơm rklaih bân. Jêh ri dăn rnê ma nau chrêk lợp ta Păng rnôk abơ dja, n'ho ma bảơ n'ho ro. Ơ ăn geh kot này ngăn ro†.\*

---

\* 3:17 3:17: 1Kô 10:12 † 3:18 3:18: 'Ơ ăn geh kot này ngăn ro', mâu lah 'Amen'. \* 3:18 3:18: Luk 2:11

Nau Kôranh Brah Ngơi Nau Tâm Rnglăp Mhe  
Mnong, Central: Nau Kôranh Brah Ngơi Nau Tâm Rnglăp Mhe New  
Testament

Copyright © 2016 Wycliffe Bible Translators, Inc.

Language: Central Mnong

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 10 Feb 2021 from source files dated 6 Feb  
2021

e066eeff-60da-5ff7-9822-f65015bcd247